

Vrijednosti i koristi zikra

[Bosanski – Bosnian – بوسني]

Senad Crnkić

2015 - 1436

IslamHouse.com

﴿ أهمية الذكر وفوائده ﴾

« باللغة البوسنية »

سناد تسرنكتش

2015 - 1436

IslamHouse.com

Vrijednosti zikra

Svaki musliman treba da zna i razumije vrijednost zikra ili spominjanja Allaha Uzvišenog, jer je zikr od najljepših djela i ciljeva koji nas približuju našem Gospodaru.

Allah Uzvišeni je na mnogo mjesta u Kur'anu naredio vjernicima da Ga spominju, da Ga se sjećaju i pohvalio je najljepšom pohvalom sve one koji budu ustrajavali na tom putu.

Rekao je Allah Uzvišeni: ***O vi koji vjerujete, spominjite Allaha jako mnogo.***¹

I rekao je: ***I oni koji Allaha mnogo spominju i one žene koje Allaha mnogo spominju, Allah im je pripremio oprost i veliku nagradu.***²

Iz pomenutih ajeta razumijemo da je Allah Uzvišeni naredio vjernicima da Ga se mnogo

¹ Prijevod značenja sure El-Ahzab, 41.

² Prijevod značenja sure El-Ahzab, 35.

sjećaju, jer je vjernik u velikoj potrebi za Allahom i za onim što je kod Njega od nagrade, milosti i oprost.

S druge strane pomen vrijednosti zikra u sunnetu Allahova Poslanika, sallallahu alejhi ve sellem, je mnogobrojan i pojašnjava koristi i fadilete zikra koje će imati svako ko ustrajava na ovom velikom djelu.

Muslim bilježi u svome *Sahihu* od Ebu Hurejre, radijallahu anhu, od Allahova Poslanika, sallallahu alejhi ve sellem, da je rekao: „**Pretekli su (vas) el-muferridun!**“ „**A ko su oni, o Allahov Poslaniče?**“ – rekli smo. Rekao je: „**Oni koji Allaha mnogo spominju (zikre) i one žene koje Allaha mnogo zikre.**“³

Bilježi Buharija u svome *Sahihu* od Ebu Musa'a el-Eš'arija, radijallahu anhu, od Allahova Poslanika, sallallahu alejhi ve sellem, da je rekao: „**Primjer onog ko spominje (prisjeća i zikri)**

³ Hadis bilježi Muslim u svome *Sahihu*, 2676.

svoga Gospodara i onog koji Ga ne spominje, je poput primjera žive i mrtve osobe. “⁴

Pomenuti ajeti i govor Allahova Poslanika, sallallahu alejhi ve sellem, ukazuju na vrijednost zikra, ustrajavanje na njemu i vrijednosti osoba koje se Allaha prisjećaju i spominju Ga u svim svojim stanjima.

Koristi zikra

Zikr je od onih djela čija je korist velika i mnogobrojna.

Učenjaci su napisali mnogo djela u kojima su pojasnili koristi zikra i spominjanja Allaha, tako da su neki pomenuli i do stotinu koristi, od kojih je najveća korist zaštita i pronalazak utočišta od prokletog šejtana, kao što je došlo u hadisima Allahova Poslanika, sallallahu alejhi ve sellem.

⁴ Hadis bilježi Buhari u svome *Sahihu*, 6407.

Bilježi imam Ahmed i Et-Tirmizi u svome *Sunenu* kao i Hakim u svom djelu *Mustedreku* od El-Harisa el-Eš'arija, radijallahu anhu, da je Allahov Poslanik, sallallahu alejhi ve sellem rekao: „Allah Uzvišeni je naredio Jahjau b. Zekerija pet stvari da radi po njima, kao što je naredio i sinovima Israila pet stvari da rade po njima..“, te je Jahja, alejhi selam, sakupio ljude u el-Mesdžidul-aksa i rekao im da mu je Allah naredio pet stvari po kojima treba da radi pa ih je i on njima naredio, pa je između ostalog rekao sljedeće riječi: „Naređujem vam da spominjete Allaha, jer primjer toga je poput primjera čovjeka koji bježi ispred brzog neprijatelja sve dok ne dođe do čvrste i jake tvrđave, pa u njoj nađe utočište (sklonište). Isto tako, vjernik ne može da se zaštiti od šejtana osim sa spominjanjem Allaha Uzvišenog.“⁵

⁵ Hadis bilježi imam Ahmed u *Musnedu*, 4/202, Et-Tirmizi u svom *Sunenu*, 2863, kao i Hakim u *Mustedreku*, 1/117-118, 1/421, i Albani ga ocjenjuje vjerodostojnim u svom djelu *Sahihul-džami'*, 1724.